

188,5 d

D63380

**DE**  
**CORNELIAE**  
**P. F. GRACCHORUM MATRIS**  
**VITA MORIBUS ET EPISTOLIS**  
**COMMENTATIO.**

---

SCRIPSIT

ET

AUCTORITATE AMPLISSIMI PHILOSOPHORUM ORDINIS

IN

UNIVERSITATE LITERAR. DORPATENSI

GRADUS


**DOCTORIS PHILOSOPHIAE**

RITE OBTINENDI CAUSA

PUBLICICE DEFENDET

**LUDOVICUS MERCKLIN.**

PHILOSOPHIAE MAGISTER, IN UNIV. LIT. DORP. PHILOLOGIAM  
PRIVATIM DOCENS.



DORPATI, MDCCCXLIV.

TYPIS HENRICI LAAKMANNI.

**I M P R I M A T U R**

ea conditione, ut numerus exemplorum lege praescriptus collegio ad libros explorandos constituto, tradatur.

Dorpati, die 14. mens. Septembr. 1844.

*Dr. FR. GOEBEL,*  
Decanus.

127604846

**F**eminarum memoriam, meritis plerumque breviorum, quo rarius fama literisque celebratam accipimus, eo videntur esse digniores, in quarum vitas mentesque cognoscendas operam nostram conferamus. Nam huic sexui concessam olim aequalem mediocritatem ab illis superari par erat, quibus ex vitae domesticae oblivione emersis, aeternam nominis gloriam captare contigerit. Sed quum et naturae ratio et leges antiquitatis a republica capessenda mulieres arcerent, vix impune illis lineas transilire licuit, quin aut morum aliquam labem contraherent, aut famae saltem iniquitatem experirentur. Quod si in universum quidem constat, tamen quantopere a Graeca consuetudine Romanorum disciplina differat, quum aliunde, tum vel eo perspicui potest, quod horum feminas matronali decore et verecundia insignitas, illorum plurimas amoribus et carminibus inclytas historiae monumenta produnt. Nempe apud utramque gentem muliebris sexus, suo circulo relicto, virorum mores sectabatur, unde apud Romanas viragines frustra quaesiveris illam Graecis insitam levitatem, quam tamen ob eandem causam Spartanæ mulieres et Pythagoreae videntur respuisse. Eandem morum indolem, non unis viris propriam, contestatur non solum mulierum in Graecia poetiarum

et philosophantium recensens, quum vix unius alteriusve Romanae litteratae ad nos nomen incerta fama detulerit, sed ab ea ingenii felicitate Graecae quoque multo pauciores quam Romanae ad atrocita flagitia delapsae videntur. In qua comparatione instituenda dolendum est, Aelianum var. h. XIV, 45, Graecas mulieres cum Romanis componentem intra trium clarissimarum nomina constituisse, scilicet quod ipsi verendum esset, ne, pluribus Romanis quam Graecis laudatis, gratificari videretur patriae. Idem vero Penelopes exemplo haud inepte contra posito, Corneliae, cui hunc libellum destinavimus, principem locum designavit. Cujus vita moresque, quum et antiquos laudatores habeant, neque tamen ab omni parte vituperatione vacent reliquiae vero, quae feruntur, ancipiti semper fama propagatae sint, consentaneum erit, in illis adumbrandis ita versari, ut de his iudicandi potestas adjuvetur.

---

Originem Cornelia duxit a clarissimis gentibus, patre nata P. Cornelio Scipione Africano majore (Plut. Ti. Gracch. 1), matre Tertia Aemilia, L. Aemilii Pauli apud Cannas occisi filia (Plut. Aem. Paul. 2.). Fuit autem Cornelia horum filia natu minor, nam majorem legimus a patre collocatam P. Cornelio Nasicae. Liv. 38, 57, 2. Quo anno nata sit, nemo veterum memoriae prodidit, sed jam tenera aetate videtur patre orbata esse, qui, si plurimis probatam sententiam sequere, mortuus est a. u. 569 = 185 a. Chr. n. (Fischer. Roem. Zeittafeln. p. 106.) Diutius matrem illi superstitem habuit, quam multae comitatis et patientiae fuisse Val. Max. VI, 7, 1. refert. cf. Polyb. 32,

12. Huic plurimum in formandis filiae moribus momenti tribuendum erit, quanquam de muliebri sexus institutione tunc temporis Romae usitata parum constat. (v. Pauly. Realencycl. S. V. Educatio.) Sed ubi matrimonium Corneliae cum Ti. Sempronio Graccho initum respicimus, maximae difficultates implicant, quippe quod conjunctum sit cum causa illa Scipionum, de qua jam inter antiquos opinionum diversitas obtinuit. Quae de re hoc loco prolixius disseri nequit, sed tantum temporis ratio enucleanda est. Succurrit gravissimum Polybii (52, 13) testimonium, tunc Romae degentis, et ob amicitiam Scipionis Aemiliani harum quoque rerum periti. Μετὰ δὲ ταῦτα ταῖς Σκιπίωνος μὲν τοῦ μεγάλου θυγατέρας, ἀδελφαῖς δὲ τοῦ καὶ τῶν πατρὸς \*, λαβόντας, αὐτὸν ἔδει τὴν ἡμίσειαν ἀποδοῦναι τῆς γέρας. Ὁ γὰρ πατὴρ συνέθετο μὲν ἑκατέρᾳ τῶν θυγατέρων ἑνὶ τάλαντα δώσειν. Τούτων δὲ τὸ μὲν ἡμῖς παραχοῆμα τοῖς ἀνδράσιν ἔδωκεν ἢ μήτηρ, τὸ δ' ἡμῖς κατέλειπεν ἀποθνήσκουσα προσοφειλόμενον. A quo non dissidet Plutarchus Ti. Gr. 4. qui relata narratiuncula de Appio Claudio, proponenti filiae nuptias Tiberio Graccho, et Antistia uxore rem invite probante, pergat: Οὐκ ἄγνωσθ' ὅτι τοῦτό τις ἐπὶ τὸν πατέρα τῶν Γράκχων, Τιβέριον, καὶ Σκιπίωνα τὸν Ἀφρικανὸν ἀναφέρουσι· ἀλλ' οἱ πλείους, ὡς ἡμεῖς γράφομεν, ἰστῶσθαι, καὶ Πολύβιος μετὰ τὴν Σκιπίωνος Ἀφρικανοῦ τελευτὴν τοὺς οἰκείους φησὶν ἐκ πάντων προκρίναντας τὸν Τιβέριον, δοῦναι τὴν Κορνηλίαν, ὡς ἐπὶ τοῦ πατρὸς ἀνέχδοτον καὶ ἀγγύλλον ἀπολειψθεῖσαν. Nam Polybius nequaquam dicit, quod ad h. l. Valesius autumavit, patrem utramque filiam despondisse, sed promississe tantum dotem, neque opus erat, ut

ad illud confugeret, quo Plutarchum cum Polybio componeret, utrumque verum esse, et a patre desponsam Tiberio Corneliam esse, et post obitum patris rursus eidem desponsam de novo, quasi antea desponsa non fuisset, vel potius ratam esse habitam patris sponsionem. — Promissio autem dotis haud dubie per testamentum facta, est potius indicium mortis imminantis. cf. Hasse Güterrecht d. Ehegatten. T. 1. p. 319. Neque coemptionem matrimonii causa factam esse (Göttling. p. 92) statuere licebit reputanti, simultatem inter P. Scipionem et Ti. Gracchum usque ad mortem fuisse. Liv. 38, 57, 4. Gell. VII, 19. Idem quum die dicta, ad quam non affuerat reus, absens citatus, voluntarium sibi exilium indiceret, atque vitam ageret Literni sine desiderio urbis, quomodo despondendae filiae occasio illa a Livio prodita existere potuit? Rem conficit Plutarchus Ti. Gr. 1. sibi atque Polybio constans: *Διὸ καὶ τὴν Σκιπίωνος τοῦ καταπολεμήσαντος Ἀννίβαν θυγατέρα Κορνηλίαν, οὐκ ὦν φίλος, ἀλλὰ καὶ διάφορος τῷ ἀνδρὶ γεγονώς, λαβεῖν ἤξιώθη μετὰ τὴν ἐκείνου τελευτήν.* Gellius 12, 8. eadem fere quae Livius tradit, ita tamen ut non cohaereant cum intercessione Gracchi et causa Scipionis, nam quo loco de his refert, 4, 8. nulla Corneliae mentio, cf. Heerwagen. de P. et L. Scipionum accusatione quaestio. Baruthi. 1836. Liebaldt de Val. Ant. Numbg. 1840. p. 16. His praemissis de anno, quo nuptiae factae sint, quaerere attinet, qui propter excerptorum Polybianorum conditionem non cum summa quidem fide, sed tamen probabiliter constitui potest. Polybius enim, postquam 32, 13 de Corneliae nuptiis retulit, quum scribat 14. de Scipione Aemiliano: *μετὰ δ' ἕτη δύο*

μεταλλάξαντος τοῦ κατὰ φύσιν πατρὸς αὐτοῦ Λευκίου, *cujus mors incidit in a. u. 594=160* (Fischer. p. 119.), illa dotis numeratio statim post matris mortem facta, pertinebit ad a. u. 592 aut 591, quoniam non liquet, utrum illud biennii spatium a morte matris an a numeratione dotis incipiat. Polyb. l. 1. Τοῦ δὲ Τιβερίου καὶ τοῦ Νασικᾶ Σκιπίωνος, οὗτοι γὰρ ἦσαν ἄνδρες τῶν προειρημένων γυναικῶν, ἅμα τῷ διελθεῖν τους δέκα μῆνας κ. τ. λ. Neque tamen ob hanc ambiguitatem omnem hujus computationis rationem abjicere oportet, quae quidem confirmatur verbis Polybii praecedentibus 11. Πλὴν ὅγε Σκιπίων — ἐν ἰσῶς πέντε τοῖς πρώτοις ἔτεσι πάνδημον ἐποιήσατο τὴν ἐπ' εὐταξίᾳ καὶ σωφροσύνη δόξαν. Quod quinquennium, additum anno, quo cum Polybio Scipio Aemilianus familiaritatem contraxit, i. e. a. n. 587=167 (Fischer. p. 145) eandem temporis notam exhibet. Mater autem Corneliae paulo post nuptias factas diem obiisse videtur. Matrimonium igitur cum Ti. Graccho initum fuerit aut a. u. 591 aut 590. Itaque inter has nuptias et patris obitum, qui aut a. u. 571, aut 570, aut 569 adscribitur, viginti minimum anni intermedii sunt, unde parum verisimile est Corneliam a patre desponsam esse, licet virgines Romanae a. aetatis 12. nobiles essent. Goettl. p. 92. Quaecunque igitur de patre sponsalium auctore circumferuntur, non solum propter Polybii et Plutarchi consensum, sed vel temporis ratione habita fabularum numero addenda sunt. Sed verissime Nitzschius (Polybius. p. 130) matrimonii causam ex partium studio repetit, Gracchorum potentem domum sibi conciliandi cf. p. 71. Quam diuturnum matrimonium fuerit tantum ex Corneliae duodecim

partibus conjicere licet, quum dies supremus mariti ignotus sit, decorum fuisse insigni fide et pietate probat causa mortis Ti. Gracchi, brevissime ab Aur. Vict. de vv. ill. c. 57. relata: „Quum in domo Tiberii duo angues e geniali toro repsissent, responso dato, eum de dominis periturum, cujus sexus anguis fuisset occisus, amore Corneliae conjugis marem jussit interfici.“ Plin. n. h. VII, 36, 122 Gracchum dixisse refert: „immo vero, meum necate, Cornelia enim juvenis est et adhuc parere potest. — Hoc erat uxori parcere et consulere republicae. Idque mox consecutum est.“ Plut. Ti. Gr. 1. — *ἔτι νέας οὐσης ἐκείνης.* (cf. Val. Max. IV, 6, 1. Cic. de div. I, 18, 55. II, 29, 62. qui eandem rem ex scripto C. Gracchi ad M. Pomponium tradit.) Unde suspicere, Corneliam gravidam relictam esse. De serpente genii simulacro in Scipionum familia obvio cf. Hartung. Rel. d. Roem. T. 1. p. 40. Ti. autem Gracchus, cujus post a. u. 591, quo alterum gessit consulatum, nulla publica memoria extat, videtur post initum matrimonium a foro bellisque abstinuisse, ejusdem vero et matrimonii finis paulo propius annis natalibus liberorum circumscribitur, quorum duo saltem probabiliter erui possunt. Plutarchus C. Gr. 1 de Gaio Graccho scribit: *ἐννέα γὰρ ἐνιαυτοῖς ἐλείπετο τὰδελφοῦ καὶ ἡλικίαν ἐκείνος δ' οὐπω τριάκοντα γεγονὸς ἀπέθανεν* et v. Ti. Gr. 4 *ἦν δὲ πρεσβύτερος ἐνιαυτοῖς ἐννέα ὁ Τιβέριος.* Tiberius a. u. 621=135 occisus est, natum igitur constat 592 aut 591, Gaium fratrem, annis novem minorem 601. aut 600. Neque probanda Ellendtii coniectura (Proleg. Brut. p. XXXVIII), propter quaesturam Hispaniensem Tiberii annum natalem 588 aut 590 constituentis,

neque Westermanni (Gesch. d. roem. Ber. p. 71.) 585 praefertis, si quidem suo anno illo munere functus sit, postquam Wexius (de legibus annalibus Rom. in mus. Rhen. III, 2. p. 282) docuit, exempla, quae legi Villiae (a. u. 574) obstare videantur, legitimis exceptionibus niti. Qualis et Ti. Graccho, qui primus in Carthaginiis muros escenderat, dari potuit, in quo fortasse et alia causa valuit, quam ex temporum ratione repetitam indicat Nitzsch. p. 35. 125. Legitimum autem ad quaesturam capesendam militiae decennium Ti. Gracchus impleverat, tot enim anni numerantur inter prima stipendia, quae Scipione Aemiliano duce a. u. 607 meruit (Plut. v. Ti. Gr. 4.) et foedus Numantinum, a. u. 617., quod illo quaestore Mancinus pepigit. cf. Wex. l. l. p. 279. Heusde de Lucil. p. 11. sq. Fischer. p. 136. Unde apparet, Ti. Gracchum patrem aliquamdiu post a. u. 600 obiisse, si quidem Tiberius duodecim liberorum fuit maximus natu. Cornelia vidua mansit, repudiata, quam Ptolemaeus Aegyptiorum rex obtulerat, diadematis torique communionem. Plut. v. Ti. G. 1. Eum Kaltwasser. (Uebers. d. Plut. T. VIII. p. 120) et Reiffius (Gesch. d. roem. Bürgernr. T. 1. p. 18.) Philometorem fuisse censent, qui vulgo dictus sit Lathyrus, cujus vita et regnum ad a. u. 608=146 pertinent. Duxerat autem in matrimonium a. u. 589=165 Cleopatram sororem, Ptolemaei Epiphanis filiam, eamque cum prole moriens reliquit. cf. Letronne Recueil des Inscr. T. 1. p. 79. Unde primum nulla ei causa alterius matrimonii jungendi existere potuit, deinde, quum non constet, utrum a. 608. Ti. Gracchus decesserit, an postea, Cornelia fortasse nondum vidua erat. Itaque ad fra-

trem ejus et successorem Ptolemaeum Euergetem II demittitur, qui usque ad a. u. 636=117 vixit, neque tamen semper Aegypti regnum tenuit. Hunc vero Corneliae matrimonium expetivisse eo majorem habet speciem veri, quod ipse jam ante Philometoris mortem bis Romae fuerat. Polyb. 31, 18. 33, 5. Champollion annales des Lagides. T. 2. p. 149. 154. Flathe Gesch. v. Maced. T. 2. p. 591. sq. Idem postquam regnum adeptus erat et in matrimonium duxerat Cleopatram, fratris defuncti uxorem, eam brevi repudiavit a. u. 609 = 145 neque ita diu post filiam ejus Cleopatram uxorem adscivit ante a. u. 614 = 140 (Letronne. p. 54. sq.) Hoc intermedio tempore Corneliam in matrimonium poposcisse credendus erit. Inde simul cum aliqua probabilitate tempus indicatur, quo Ti. Gracchus pater inter vivos esse desierit.

Corneliam cum duodecim liberis Gracchus reliquit, (Plut. v. Ti. G. 1.) quorum sex filii, totidem filiae erant. Plin. n. h. VII, 13, 57. „Item alii aliaeque feminas tantum generant aut mares, plerumque et alternant, sicut Gracchorum mater duodecies.“ Novem immatura mors praeripuisse videtur, quum nulla eorum memoria redundet. Plut. Ti. Gr. 1. *Καὶ κηρέουσα τοὺς μὲν ἄλλους ἀπέβαλε παῖδας.* Seneca cons. ad Helv. 16. oratorie potius quam accurate scribit: „Corneliam ex duodecim liberis ad duos fortuna redegerat. Si numerare funera Corneliae velles, amiserat decem, si aestimare, amiserat Gracchos.“ Id. ad Marc. 16. „Ex una tibi familia duas Cornelias dabo. Primam Scipionis filiam, Gracchorum matrem, duodecim illa partus totidem funeribus recognovit, et de ceteris facile est, quos nec editos, nec amissos civi-

tas sensit.“ cf. Gerlach. *hist. Stud.* p. 245. ann. In quibus pariter ab historica fide declinavit. Nam tres liberos Corneliae fortuna reservavit, Tiberium Gaiumque Gracchos et Semproniam, quam in matrimonium collocavit Scipioni Aemiliano, tempore, quo, ut recte scribit Reiffius (l. l. p. 18) duo illi fratres nondum adulti erant. Ita enim statuere jubemur verbis Plut. *Ti. G.* 8. *Ἐνιοὶ δὲ καὶ Κορνηλίαν συνεπαιτιῶνται τὴν μητέρα πολλὰκις τοὺς υἱοὺς ὀνειδιζούσαν, ὅτι Ῥωμαῖοι Σκιπίωνος αὐτὴν ἔτι πενθέραν ὄντω δὲ μητέρα Γράκχων προσαγορεύουσιν,* unde liquet Semproniam Aemiliano nupsisse ante latam legem agrariam Tiberii, i. e. ante a. u. 621. Ex iis autem, quae Val. M. III, 8, 6. refert, colligitur, eam tribunatu L. Apuleji Saturnini, i. e. sexto Marii consulatu, a. u. 653. etiamtum vixisse. Sic geminata affinitate Cornelia Sempronique gentes junctae, sed parum laeto successu, videtur eam odii, quod patres conceperant, semper aliquid in posterorum animis resedisse. Corneliam, liberorum amantissimam, his optime educandis insignem operam navasse, nisi totius antiquitatis consensu constaret (Plut. *Ti. Gr.* 1. Cic. *Brut.* 27. 58. *Dial. de or.* 28.), vel illud efficeret, quod ex Pomponii Rufi *Collectorum* libro Val. M. IV, 4, 1. repetit: „Cornelia Gracchorum mater cum Campana matrona, apud illam hospita, ornamenta sua pulcherrima illius saeculi ostenderet, traxit eam sermone, quousque e schola redirent liberi et, Haec, inquit, ornamenta mea sunt.“ Cujus scriptoris, ceterum obscuri, auctoritatem tanto majoris facere soleo, quod inter Pomponios et Gracchos necessitudo quaedam et amicitia fuisse videtur. Mater enim P. Scipionis Africani majoris fuerat Pomponia

(Sil. Ital. XIII, 615), Pomponius C. Gracchum, cujus liber ad eundem scriptus Ciceronis tempore superabat (de div. II, 29, 62), in extremo vitae discrimine adjuvit, (Val. M. IV, 7, 2) apud Pomponium vatem Plinius major Gracchorum manus vidit post annos CC. (n. h. XIII, 26, 12) et ad M. Pomponii Attici patrem fortasse Junius Gracchanus, a C. Gracchi amicitia cognominatus de potestatibus scripsit. Cic. de legg. III. 20. (v. quae scripsi in *Annal. Berol.* 1843 Nr. 39. p. 307.) De Pomponiis literatis cf. Welcker. *Griech. Tragoed.* T. 3. p. 1441. Corneliae autem animum haud dubie aluerat literarum Graecarum notitia et Graecorum hominum consuetudo, quibus ex Graecia obsidibus aut profugis Scipionum et Aemiliorum domus patebat, quales nobis innotuerunt Polybius, Panaetius, Diophanes Mitylenaeus, Blossius Cumaeus, Antipatri Tarsensis discipulus et familiaris. cf. Nitzsch. I. I. p. 29. 58. Plut. v. Ti. Gr. 8.

Ad reliquam Corneliae vitam pernoscendam non alienum erit quaerere, quo loco versari solita sit. Sunt autem tres commemorandi modi, quibus utrum semper, an aliquamdiu usa fuerit, distinguendum est. Aut enim semper extra urbem, aut semper Romae degentem, aut alternantem domicilium habebimus. Atque in urbe aliquando degisse, quum per se sit consentaneum, tum eo nos ducit narratio de Campana hospita et liberis e schola redeuntibus, tum philosophorum in urbe degentium filiosque docentium memoria. Verum Campanae illius mentio, et Blossii Cumaei nomen, haud dubie Blossiorum Campanorum, quos Livius 23, 7. 27, 3 commemorat gentilis, ad Campaniam nos remittit, ubi Scipio pater in Liternino exul degisse

fertur. (Liv. 38, 52, 1. Val. M. II, 10, 2.) Itaque ex hoc tempore aut ex alia peregrinatione hospitii illius causa repetenda erit. Verisimile est Corneliam postea usque ad mortem Tiberii filii Romae habitasse, quam deinde relictam, nunquam repetivisse mihi quidem persuasum est. Legimus enim apud Orosium V, 12. „Caput Gracchi excisum consuli allatum est, corpus ad Corneliā matrem Misenum oppidum devectum est“ (quam vocem frustra torquet Gerlach. Ti. n. C. Gr. p. 62). „Haec autem Cornelia, Africani majoris filia, Misenum post prioris filii mortem secesserat.“ Quibus nihil fidei detrahitur, quod Plutarchus in extrema demum C. Gracchi vita scribit (v. C. Gr. 19) *Ἀβτῆ δὲ περὶ τοὺς καλουμένους Μισσηνοὺς διέτριβεν.* Urbis relinquendae consilium quin Corneliae tristis Tiberii exitus et in amicos habitae ab adversariis graves quaestiones dederint, mihi non est dubium. Ita, fractis partibus Gracchanis, securitati consuluit et fortasse vitam adeo atque rem familiarem inimicorum odio et invidiae subtraxit. Quam exulandi causam qui veram nos vidisse concesserit, idem Corneliam semper urbana commoratione abstinuisse facilius credet. Verum cum hac persuasionem quomodo conciliari possunt verba C. Gracchi, apud Ciceron. de or. III, 56, 214 servata? „Quo me miser conferam? quo vertam? in Capitoliumne? at fratris sanguine redundat; an domum? matremne ut miseram lamentantem videam et abjectam?“ Absurdum enim foret, domum ad Misense Corneliae domicilium referre, quum aedes C. Gracchi, quas in Palatio fuisse scimus (Plut. v. C. Gr. 12), si ipsum in foro concionantem fingis, unde utrumque montem suspiciebat,

hanc cogitandi seriem excitasse videantur. Neque prudentius rem expediremus, si audire liceret Ellendtium (ad Cic. de or. l. l. T. 2. p. 459), qui, quoniam Quintilianus XI, 3, 115 eadem breviata sic affert: „quo me miser conferam? in Capitoliumne ad fratris sanguinem? an domum?“ quae, inquit, quo simpliciora sunt, eo certius Gracchi aetatem referre videntur, etsi matris ille pluribus sane meminisse potuit. — Nam neque C. Gracchi reliquiae insignis breviloquentiae exempla continent, neque subjectionis figura, ubi proponuntur, quae objici possunt, et statim refutantur, perfecta foret, neque ii loci, qui dicti Gracchani imitationem referre creduntur (cf. Vulpius ad Catull. 63, 177. p. 291) brevioris formae fidem faciunt. Deinde Ciceronis auctoritas praeferenda erit, qui Gracchorum aetati propior, orationes eorum legisse profitetur (Brut. 53.), quod quidem de Quintiliano affirmare non licet. Itaque credendum est Spaldingio ad Qu. l. l., hunc scriptorem sive pro more consulto contraxisse, sive memoria lapsum esse. Adde quod Cic. l. l. ita praefatur: „Quid fuit in Graccho, quem tu melius, Catule, meministi, quod me puero tantopere ferretur?“ unde etiamsi Gracchi verba non legisse videatur, sed ex ore hominum referre, tamen fides ejus non debilitatur. Sed jam alia instat quaestio paulo difficilior de tempore, quo ita locutus esse C. Gracchus arbitratus sit. Duorum vv. dd. conjecturas novi, quarum neutra placet. Ellendtius Prol. Brut. p. XLIV. „Non multo ante ultimam necessitatem negantibus pacem inimicis eam orationem habitam a Graccho crediderim“ Id. ad. Cic. de or. l. l. „Verisimile est ex oratione desumpta esse, quam

C. Gracchus habuerit cum L. Opimius eos. factionem senatoriam ad arma vocasset." At Plutarchus v. C. Gr. 16. voluisse quidem Gracchum adire senatum scribit, sed prohibitum esse ab amicis, et tamen coram inimicis locutum oportet, si vera sunt, quae addit Cic. l. l.: „Quae sic ab illo esse acta constabat oculis voce gestu, inimici ut lacrimas tenere non possent." Altera Meyeri Or. Rom. fr. ed. sec. p. 248: „Ego potius orationi de legibus a se promulgatis vindicaverim." Cujus nullam video necessitatem aut commendationem. Sed huic pariter atque illi obstat, quod duodecim aut undecim annorum spatium, quot quidem inter caedem Tiberii et priorem aut alterum Gaii tribunatum sunt, parum aptum videri possit imagini Capitolii sanguine fraterno redundantis, multoque minus in matrem quadrat, quam vix credibile est, tamdiu Tiberio illacrymasse, quamque insuper Plutarcho teste (v. C. Gr. 19.) fortiter filiorum casus tulisse novimus. Quae cogitatio necessario ad tempus nos ducit, quod Tiberii caedem proxime insecutum est, quo Corneliā Romae commorantem facere nulla re vetamur, eamque cum filio superstitute in deflenda Tiberii nece multos fuisse, naturae consentaneum erat. Ceterum quis negaverit, Gaium Gracchum in concionibus fraterna caede saepius usum esse, quo efficaci artificio popularium animos excitaret? Quamobrem non opus est, ut hoc dictum propter Plutarchi verba v. C. Gr. 3. Παραλαβὼν δὲ τὴν ἀρχὴν, εὐθὺς ἦν ἀπάντων πρῶτος, ἰσχύων τε τῷ λέγειν, ὡς ἄλλος οὐδεὶς καὶ τοῦ πάθους αὐτῷ παρδῆσιαν πολλὴν δίδοντας ἀνακλαιόμενῳ τὸν ἀδελφόν, ad tribunatus tempora referatur. Rempublicam autem C. Gracchus admodum juvenis attigerat,

a fratre triumvir agris dividendis creatus. Liv. Ep. 58. Vellei. II, 2. Itaque nihil est, cur Corneliam usque ad supremum diem Miseni degisse negemus, cui sententiae qui unus refragari possit Plutarchi locus v. C. Gr. 4, eum infra tractabimus. De vitae ratione Plutarchus. v. C. Gr. 19 nos certiores facit. *Αὕτη δὲ περὶ τοὺς καλουμένους Μισσηνοὺς διέτριβεν, οὐδὲν μεταλλάξασα τῆς συνήθους διαίτης. Ἦν δὲ καὶ πολὺφιλος καὶ διὰ φιλοξενίαν ἐδιδράπεζος, ἀεὶ μὲν Ἑλλήνων καὶ φιλολόγων περὶ αὐτὴν ὄντων, ἀπάντων δὲ τῶν βασιλέων καὶ δεχομένων παρ' αὐτῆς δῶρα καὶ πεμπόντων.* In quibus extrema nobis paulo obscurius dicta sunt, et fortasse veritatem excedunt, quum praeter Ptolomaeum regem nemo alter in censum veniat. Quando obierit Cornelia non constat, nam quod a. u. 653 Sempronia filia ad populum producta est, quae Equitium, Tiberium fratrem parentem sibi eminentem refelleret, minus probat, illam jam decessisse, quam potius perpetuam ejus ab urbe absentiam confirmat. Quidni enim etiam tum vixerit, quae quibusdam prae senectute amens facta visa sit? (Plut. v. C. Gr. 19.) Non magis liquet, utrum ei vivae, an mortuae populus Romanus (a filio statuum positam festinanter scripsit Fabricius bibl. Lat. T. I. p. 110.) honorem statuae concesserit. Plut. v. C. Gr. 4. *ἥς γε καὶ χαλκῆν εἰκόνα στήσας ὕστερον ἐπέγραψε (ὁ δῆμος) Κορινθίαν, μητέρα Γράκχων,* de qua Plin. n. h. 34, 6, 14. „Exstant Catonis in censura vociferationes, mulieribus Romanis in provinciis statuas poni, nec tamen potuit inhibere, quo minus Romae quoque ponerentur, sicut Corneliae Gracchorum matri, quae fuit Africani prioris filia. Sedens huic posita, soleisque sine amento insignis in

Metelli publica porticu, quae status nunc est in Octaviae operibus.“ Ad quae primum observandum est, Catonis a. u. 570 = 184 censoris mentionem minime ad eam aetatem pertinere, quo Corneliae statua posita sit, cui eum honorem non ante filios legibus latis inclarescentes contigiase consentaneum est, fortasse eodem tempore, quo populus horum desiderio commotus, publicam iis, statuâ positâ memoriam tribuit. (Plut. v. C. Gr. 18.) Deinde Metelli porticus, in cuius locum postea Octaviae porticus successit, exstructa est a. u. 605 a. Q. Caecilio Metello Macedonico, quo anno Cato obiit. cf. Becker. Handb. d. roem. Alterth. T. 1. p. 608. sq. Beschrbg. d. St. Rom. T. 3. P. 3. p. 33. sq. De amento Paul. Diac. p. 12. M. cf. Becker. Gallus. T. 1. p. 37. T. 2. p. 103. Soleae sine amento utrum artificis negligentiae imputandae sint, an aliud quid sub his lateat, non habeo dicere. Corneliae cum Campana hospita congressum ars quoque recens tabulis ab Angelica Kaufmann et Hetschio pictis celebravit. (v. Goethe. Op. T. 24. p. 89. T. 26. p. 87.)

Praeter consentientes laudes a liberorum educatione antiquitus Corneliae tributas ad mores ejus cognoscendos animus facit, quo filiorum vitam publicam prosecuta sit. Quo nomine si Tiberium respicimus, unum Corneliae dictum a Plut. v. Ti. Gr. 8. relatam deprehendimus, reprehendentis filios, quod Scipionis adhuc socrus, neque Gracchorum mater audiat, unde tamen parum liquet, utrum tribunicia Tiberii consilia probaverit an aversata sit. Nam quod deplorantem matrem immaturam Tiberii mortem ipse Galus memorat (Cic. l. l.) humano et materno animo ita dignum est, neutrius senten-

tiae ut nos certiores faciat. Paulo validius documentum mihi ex secessione ejus petere posse videor, qua causas quoque caedis in Tiberium factae improbasse censenda est. Cujus periculosum opus, si ab initio quidem summa tantum expectatione nihil eum aut impellendo, aut deterrendo prosecuta fuerit, Gaium tamen, eadem ausum, ut majori cura et consilio faveret, et propter illius caedem par erat, et scriptorum testimonio evincitur. Sic privilegium in M. Octavium Caecinam latum, quo vetabatur is, cui populus semel magistratum abrogasset, iterum creari posse, C. Gracchus sustulit, φήσας, τῇ μηρὶ Κορνηλία δεηθείση χαρίζεσθαι τὸν Ὀκταούριον. Καὶ ὁ δῆμος ἠγάσθη, καὶ συνεχώρησε, τιμῶν τὴν Κορνηλίαν οὐδέν ἦτρον ἀπὸ τῶν παιδῶν, ἢ τοῦ πατρὸς. Tulerat autem eam legem, quam unus Plutarchus commemorat, ut ex narrationis ejus serie apparet, priore tribunatu. a 631. Quo tempore Cornelia Miseni degisse credenda est, nam si Romae affuisset, illi consilio de lege ferenda cognito, impedivisset opinor, quominus eam proponeret, neque ejus absentia obstat, quominus ante perlatam legem ad eam tollendam filium permoverit, quum vel ante legem Caeciliam Didiam (a. u. 655.) trinundinum observari solitum sit. Liv. III, 35. Dion. Hal. X, 3. cf. Schulze üb. d. Volksverm. d. Roem. p. 208. Quam causam tollendi, quum ipse ingenue apud populum profiteretur, non mirum est, adversarios matrem, tanquam consiliorum filii participem et moderatricem, conviciis lacerasse, ita ut ejus patrocinium suscipere C. Gracchus non semel coactus fuerit. Quo pertinet illud a Plat. v. C. Gr. 4 servatum: Σὺ γὰρ Κορνηλίαν λοιδορεῖς, τὴν Τιβέριον τεκοῦσαν; et Πνα δ'

ἔχων παρῳησίαν, συγκρίνεις Κορνηλία σεαυτόν; „Ἐτε-  
 κες γὰρ, ὡς ἐκείνη; Καὶ μὲν πάντες ἴσασι Ῥωμαῖοι  
 πλείω χρόνον ἐκείνην ἀπ' ἀνδρὸς οὖσαν, ἢ σὲ τὸν ἄνδρα.  
 quae in Maevium dicta esse videri possunt. cf. Isi-  
 dor. Or. 19, 32. Senec. cons. ad Helv. 16. Contra  
 incerta sunt atque dubia, quae instigasse filium  
 matrem produnt. Plut. v. C. Gr. 13. ἐνταῦθα  
 (a. u. 632) καὶ τὴν μητέρα λέγουσιν αὐτῷ συστασιά-  
 σαι, μισθουμένην ἀπὸ τῆς ξένης κόρυθα καὶ πέμπουσαν  
 εἰς Ῥώμην ἄνδρας, ὡς δὴ θειριστίας· τὰυτα γὰρ ἐν  
 τοῖς ἐπιστολίοις αὐτῆς ἠνιγμένα γεγράφθαι πρὸς τὸν  
 εἰόν. Ἐτεροὶ δὲ καὶ πᾶν τῆς Κορνηλίας δυσχεραίνου-  
 σης τὰυτα πρῶταεσθαι λέγουσιν. Ad quae illustranda  
 facit Jul. Vict. a. rh. 27. p. 266, Or. „Lucem  
 vero epistolis praefergere oportet, nisi quum con-  
 sulto consilio clandestinae literae fiant, quae tamen  
 ita ceteris occultae esse debent, ut his, ad quos  
 mittantur, clarae perspicuaeque sint. Solent etiam  
 notas inter se secretiores pacisci, quod et Caesar  
 et Augustus et Cicero et alii plerique fecerunt.“  
 Narrationis autem ambiguitas, quam non dirimere  
 ausus est, sed referre maluit Plutarchus, mihi par-  
 tium invidiae deberi videtur, quorum commenta,  
 quantum hujus aetatis historiae detrimentum attu-  
 erint, mecum alii senserunt. Equidem eorum sen-  
 tentiam praetulerim, qui invita Cornelia filium Opi-  
 mio consuli adversatum esse scripsere, ut mores  
 matris, quales cognovimus, constantes sibi et per-  
 petuos habeam. Neque quibus id displicet, utram-  
 que famam simul veram esse dabimus, ut opitulata  
 quidem sit filio in summo discrimine versanti, licet  
 omnino ejus consilia improbaret, eique graviter suc-  
 censeret, quum infaustum exitum animus praesa-  
 giret, talem agendi rationem matri condonantibus.

Nam si discrepantiae fundus matris epistolae erant, alterutrum verum esse debuit; quid autem praeoptandum sit, vel Plutarchi adhibita cautione significatum est. Mortuos vero filios, quorum acta, dum vivebant, improbaverat, justo amore prosequeretur, atque virili prope animo, quem fortasse, Stoicorum praecepta nutriverant, desiderium eorum cohibuit. Plut. v. C. Gr. 19. *Καὶ μέντοι καὶ ἡ Κορηλία λέγεται τὰ ἑτέρα ἄλλα τῆς συμφορᾶς εὐγενῶς καὶ μεγαλοψύχως ἐνεγκεῖν, καὶ περὶ τῶν ἱερῶν, ἐν οἷς ἀνηρέθησαν, εἰπεῖν, ὡς ἀξίους οἱ νεκροὶ τάφους ἔχουσιν. — Θανμασιωτάτη δὲ, τῶν παιδίων ἀπενθῆς καὶ ἀδάκρυτος μνημονεύουσα, καὶ πράξεις ἀντιῶν, ὡς περ ἀρχαίων τινῶν, ἐξηγουμένη τοῖς πυνθανομένοις. Senec. cons. ad Helv. 16. ad. Marc. 16.*

Verum ejus feminae animo, pietate, castimonia, integritate et candore sanctissimo, cui meritas laudes jam antiqui tribuerunt, una tamen labes adspersa est, et a veteribus et ab recentioris aevi hominibus propagata et aucta: suspicio caedis in P. Cornelium Scipionem Aemilianum, generum et fratris adoptivum filium, a. u. 625 patratae. Cujus viri mors subita, quum jam aequalibus non fatis deberi videretur, sed propter ejus in partibus tunc Romae decertantibus locum invidiae potius et violentiae tribuenda, tanta jam antiquitus famae diversitas obtinuit, ut vel aetate haud ita remoti arbitri, rumoribus variis significatis satagere maluerint, quam certam ipsi sententiam proferre ausi sint. Trium autem mortis generum, fato, morbo, voluntati debitae auctoribus antiquis indicia quaedam suppeditantibus, larga conjectandi materia se offert, quam, quo magis ambigua atque incerta ad nos antiquitatis testimonia pervenerint, eo acrius

doctorum hominum contentio excussit. Exitu voluntario omisso, quippe qui nullis fere antiquorum testium documentis, neque ex rerum conditione petitis probetur, jam inter mortem fatalem et violentam quam maxime nutat opinio. Postquam enim Vitus Theoph. Scheu diss. hist. crit. de morte Scipionis Africani minoris ejusque auctoribus. Viteberg. 1809. 4. repetita et annot. instructa a Beiero ad calcem ed. Laelii Cic. p. 174—201 mortis fatalis patrocinium susceperat, nuper F. D. Gerlach, in libello inscripto: *Der Tod des P. Cornelius Scipio Aemilianus*. Basel. 1839. caedis partes egit, Papirio Carboni scelus commissum imputans, in qua sententia v. d. perstitit, tralata ea commentatione, paucis aucta et emendata in *Studia historica*. 1841. p. 202—254, ejusque subscriptorem in universum nactus est G. F. Hildebrand, qui libelli Gerlachiani doctam atque prolixam censuram exhibuit in *Jahn. annual. philol.* 1840. vol. 29. fasc. 4. p. 373—400., crimine tamen necis a Papirio Carbone ad Fulvium Flaccum transposito. Eos enim, qui insidiis neatum Scipionem sibi persuaserunt, altera statim excipit quaestio de auctore caedis ex pluribus, qui in suspicionis communionem veniant, constituendo. Propter cujus rei impeditam et ancipitem naturam non defuerunt, qui post illos rursus Scheuianae sententiae defensores existerent, Brückner in *diar. phil. Darmst.* a. 1841. N. 52. p. 425., K. W. Nitzsch, *Polybius Kiel* 1842. p. 83. Peter, *Zeittafeln der röm. Gesch.* p. 151. Quibus interpositis Gerlachius nihil sententiam mutasse videtur, quantum judicare licet ex *scriptione nupera: Tiberius u. Gaius Gracchus*. Basel 1843. Quam quaestionem quum hujus loci

non sit totam retexere, neque spes arrideat iore, ut pro fontium conditione quidquam certi effici possit, magnopere tamen ad Corneliae mores pertineat, utram de ea re sententiam probaveris, necessarium visum diligentius perquirere, quo jure quave injuria ad eam suspicionis ignominia delata sit. A qua profecto non fortius defendi potuerit, quam si contigerit probare, Scipionem fatis functum esse, unde primum nostrum putavimus, quibus ea sententia argumentis nitatur, inquirere. Solent autem ejus tres auctores proferri. Vellei. II, 4, 6, „Sen fatalem, ut plures, sen conflam insidiis, ut aliqui prodidere memoriae, mortem obiit“ — quae utrum fontibus revera dinumeratis, an paulo confidentius et negligentius scripserit, parum refert, quum non ex numero testium, sed ex auctoritate eorum et pondere fides historica suspensa sit. (Gerlach. Tod d. Sc. p. 54. Hildebrand p. 577.) Miror Brücknerum hunc locum omisisse. Accedit Plut. v. Rom. 27. οἱ μὲν ἀτομάτως ὄντα γήσει νοσώδη, καμῆν λέγουσιν. Sed Dion. Cass. fr. Peirese. 89. οὐκοῦν οὐδὲ τῶν ἀντιστασιαστῶν τις ἀπὸ θανάτου ἐρήσθη· ἀλλὰ καὶ ἐκεῖνοι καίπερ βαρύτερον αὐτὸν σφίσι νομίζοντες εἶναι ἐπόθησαν χρήσιμόν τε γὰρ πρὸς τὰ κοινὰ ἐώρων καὶ δεινὸν οὐδὲν οὐδ’ ἂν σφεῖς παθεῖν ἀπ’ αὐτοῦ προσεδόκων. ἐπέξαιρεθέντος δὲ τούτου — non possum cum Brücknero p. 428 testimonium de naturali morte habere, quum vocis θανάτου ambigua potestas sit, alterius vero ἐπέξαιρεθέντος etiam sublatae vitae indicium contineat. Neque ab hoc scriptore, Livium sequi solito (cf. Ep. l. 59.), aliud quid exspectare licebat. Plurimum auctoritatis si sana esset, C. Laelii oratio haberet, apud Schol. Bob. ad Cic. pro Mil. 72. p. 283. Or.

„super Africani laudibus extat oratio U. Laelii sapientis, qua usus videtur Q. Fabius Maximus in laudatione mortui Scipionis, in cujus extrema parte haec verba sunt: Quapropter neque tanta diis immortalibus gratia haberi potest, quanta habenda est, quod is cum illo animo atque ingenio in hac civitate potissimum natus est, neque ita moleste atque aegre ferri, quam ferendum est, cum eo morborum te movit, et in eodem tempore petuit, cum et vobis et omnibus, qui hanc rempublicam salvam volunt, maximo vivo opus est Quirites.“ Ita cod. ms., unde Maius fecit: *cum eo morbo obiit et in eodem tempore periit*; Orellius scripsit: *quum eo morbo mortem obiit, et in eo tempore periit*. Quibus non contentus R. K (Lottz?) in Annal. hist. et polit. ed. Bülow 1842 p. 372. *mortem obiit*, retinendum censet, quum aperte codex *tem* praebeat, *eo morbo* vero, tanquam nullius sensus spernenda, et flagitante enunciatorum aequalitate scribi jussit: *quod eo momento mortem obiit, et in eo tempore periit, cum et vobis*. Quae quam languida sint, non opus est pluribus exponere. Incisorum autem parallelismus, quem dicit K., hoc loco, ut in praecedentibus significandus erat particula *atque*. Sed corrupta esse Laelii aut Fabii verba quanquam non ibimus infitias, tamen propterea cum Hildebrando p. 377 non erunt tanquam spuria rejicienda. Quicquid autem scriptum fuit, licet sperare id ejusmodi fuisse, ut novum aliquod fatali morte decedentis Scipionis inde documentum peti non potuerit. Neque enim ob aliam causam scholiasta videtur hanc orationis funebris particulam attulisse, nisi ut aequalis et propinqui testimonio confirmaret.

ea, quae apud ipsum leguntur: „repentina morte domi suae interceptus est, non sine infamia et ipsius C. Gracchi et uxoris suae Semproniae.“ Recte tamen Klotzius vidit, morbi vocabulum huic loco parum idoneum esse, quod ne ad illud quidem mortis genus, quo Scipio, pridie validus et integer, obierit, pertineat. De ea autem difficultate, qua Laelius duobus Africani propinquis, cum laudaturis, scripserit (Cic. de or. 2, 84, 341), etiamsi nullo simili exemplo illustrari possit, tamen non video, cur tantopere illud utendi verbum ad usum quendam ex parte et Hildebrandus p. 376 et Gerlachius p. 46. (Stud. hist. p. 252.) restringant, quum eandem vocem Cic. de or. I. I. sensu quotidiano adhibeat. Orationum aliis scriptarum ex laudativo genere ipsius Ciceronis exemplum attulit Ellendt. ad Cic. de or. p. 334, cui addendus Tac. An. XIII, 3. — Itaque de naturali Scipionis morte unum Velleji et Plutarchi testimonium superat, quod qui caedem factam asseverantibus praetulerit, Corneliam nefarii sceleris expertem habeat. Sed nobis satis multi et graves auctores sunt, qui necatum Scipionem aut aperte contendunt, aut ex superiorum scriptorum mente suspicionem caedis repetunt, Liv. Ep. 59. Oros. V, 10. Val. M. IV. 1, 12. Plut. V. C. Gr. 8. v. Rom. 27. Appian, b. c. 1, 20. unus ille, qui nominatim Corneliam ream facit. Recentiores plurimum momenti tribuere solent Ciceronis iteratis de ea re sibi que constantibus dictis. De quibus nolo repetere, quae verissime monuit Brückner. p. 429. Nusquam enim Cicero de vi Scipioni illata persuasum sibi esse profitetur, sed homines ita censuisse aut existimasse caute scribit. de am. 3, 12, ad fam. 9, 21, 3.

Verum etiamsi de genere mortis, quam Scipio perpressus sit, multo apertius constaret, Corneliam tamen eo crimine liberari posse confido, cui duae maxime res patrocinantur. Nam suspiciosus hominum criminationibus, partium invidia excitatis et auctis morum integritas adversatur per totam vitam continuo probata, obstat filiorum, maternae disciplinae alumnorum animus moderatus et ab omni vi abhorrens. Corneliam igitur, virtutis perpetuitate conspicuam, dum ab ea ne semel quidem delapsam concedo, sed vel contra Appiani testimonium flagitio atrocissimo eximendam censeo, id quam recte fecerim, psychologiae peritiores judicent. Sed ad eam persuasionem stabiliendam accedit alterum argumentum. Nam si vera sunt, quae supra de commoratione Corneliae disputavimus, ea a. u. 625, quo Scipio decessit, ne Romae quidem fuit. Licet enim tempus, quo urbem reliquit, non possit accurate definiri, tamen si propter caedem Tiberii et res quae hanc secutae sunt, Misenum demigravit, eodem potius anno urbem reliquisse putanda erit, quam quatuor minimum annos remansisse. Consilium autem Scipionis necandi, si a quoquam est initum, citius ortum videtur, quam quod per epistolas ei absentem communicatum videri possit (Vellei. II, 4. reversus in urbem intra breve tempus — repertus est mortuus); quod etiamsi licuisset, tamen parum verisimile est, eam mentem praeter necessitatem, pluribus traditam esse, nedum feminae, filii coepta fortasse jam improbanti. Cui si constanter caedis suspicio adhaesisset, num quaeso veri est simile, populum, qui Scipionis desiderio flagrabat, Corneliae memoriam statua posita nobilitatae? Denique

non perspicitur, quid tantoq̄ere eam ad illud flagitium adigere potuerit. Facile enim dabo matrem filio periclitanti vita ut succurreret, ad minus licita confugere potuisse, qualia sunt, quae Plut. v. C. Gr. 13. de operis Romam missis refert, caedem verò inimicorum, ipsi filii, quamvis multis vehementer adversantibus, nunquam salutis medelam adhibuerunt. His vindictis Corneliae virtuti satisfacisse mihi videor, neque iis diutius audiendis vacabo, qui a praccipite, effrenato et ferventi honoris studio criminis commissi causam repetunt, sicuti Hildebrandus. p. 387. scribit: „So möchten um das Ganze kurz zusammen zu fassen, Liebe zur höhern Bildung, unbegrenzter, glühender, ja wilder Ehrgeiz, durch den die Mutterliebe sich stärkte und bethätigte, und ein entschiedener freier Sinn, der allen Stürmen des Lebens gewachsen war, als die Grundzüge hervorzuheben sein in dem Charaktergemälde der Cornelia.“ quem propter illa verba jam Gerlachius. hist. Stud. p. 244. castigavit, licet ipse p. 242 non prorsus ab eo dissentiens. Idem p. 399 ex Ciceronis de n. d. III, 32, 80. verbis videtur mihi justo plura collegisse. „Cur Africanum domestici parietes non texerunt?“ quippe, ait, ex intimo aedium caedes profecta sit, Semproniam uxorem a Cornelia corruptam indicari ratus. Sed comparatis quae autecedunt exemplis foris pereuntium et sequentibus: „Cur — P. Rutilius in exilio est? cur socialis meus interfectus domi suae Drusus — Cur enim Marius — domi suae senex est mortuus“ (cf. pro Mil. 7, 16.) apparet, Ciceronem, ut probet deos ne bonis quidem consulere (§. 79), foris necatis interponere

domi sublato, sine ulla cogitatione domesticine an alieni caedem perpetraverint.

Quae hucusque de vita moribusque Corneliae proposuimus, non sunt alio consilio scripta, quam ut epistolarum, quae sub ejus nomine feruntur fidei et auctoritati dijudicandae viam aperiant. Ad quam quaestionem solvendam quum vv. dd. multa et diuturna dissensio invitet, tum et literarum antiquitatis instaurandarum cura philologis permissa provocat. Nam literarum Latinarum ambitus, licet Graecis inferior sit, tamen non minus atque illae, reliquiis dubiis et incertis abundat, unde inconstantia quaedam ingrata et ambiguitas iudicii haesitantis exoritur. Deinde quo pauciora ex aetate Gracchorum prosariae orationis fragmenta supersunt, epistolarum vero muliebri stilo scriptarum nihil prorsus diem tulerit, eo majoris momenti foret, si has reliquias pro genuinis habere liceret. Simul tamen inde ejus quaestionis penitus perspicendae difficultas crescit, impedita fere aut praeclosa adeo comparandi opportunitate. Sed ut ad propositum nostrum gressum faciamus propiorem, epistolarum Corneliae notitia ex antiquitate repetenda est. Antiquissimum testem habemus Cicero-  
nem, Brut. 58, 211. „Legimus epistolas Corneliae, matris Gracchorum; apparet, filios non tam in gremio educatos, quam in sermone matris.“ Idem vero Gracchorum orationes legerat. Brut. 27, 104. 31, 117. 33, 125, 126. Proximus illi Quintilianus 1, 1, 6. „Nam Gracchorum eloquentiae multum contulisse accepimus Corneliam matrem, cujus doctissimus sermo in posteros quoque est epistolis traditus.“ Quae ita scripta sunt, ut ipse non legisse videatur illas literas, quae tamen secundum

extrema verba etiamtum superstitēs erant. Earum duobus locis Plutarchum mentionem facere (v. C. Gr. 4. 13) supra vidimus, quorum alter ita comparatus est, ut non lectas fuisse illi epistolas, mihi quidem aperte indicet: λέγουσιν — ταῦτα γὰρ ἐν τοῖς ἐπιστολίαις ἡμιγμένα γεγράφθαι πρὸς τὸν υἱόν, quam lectionem codd. a Sintenisio collati confirmant, quorum nullus γέγραπται exhibet. Itaque festinanter Heerenius scripsit in Comm. soc. Gott. Vol. IV, p. 92: „Legebantur a Plutarcho matris Corneliae ad Caium filium epistolae, ex quibus nonnulla saltem eum in usum suum convertisse certum puto,“ quae ut pluribus persequar, nunc non opus. Cautius Lange: (Verm. Schr. p. 110) „At Plutarchus vel hoc incertum reliquit, utrum tale quid omnino in epp. significatum fuerit, necne.“ Quae literae si forte jam aetate Quintiliani rarescebant, impeditum est affirmare, eas collocatas fuisse in tribus epistolarum libris, quas ex antiquariorum bibliothecis Crassus Mucianus contraxit. dial. de or. 37. Neque quis justius ad eadem Plinii n. h. XIII, 26 verba retulerit, testantis, se Ti. et C. Gracchorum manus apud Pomponium Secundum vidisse, quo quidem vocabulo et orationes et epistolas comprehendere licebit, quibus matris literae fortasse junctae fuerint. Uno igitur Ciceronis testimonio docemur, quousque illae reliquiae in manibus hominum versatae sint. Non enim facile alicui Lindemannus de Corneliae verbis persuadebit, quae apud Charisium detexisse sibi visus est. Ad cuius locum 1, 23. (p. 57. L.) „Heres, parens, homo, etsi in communi sexu intelligantur, tamen masculino genere semper dicuntur. Nemo enim aut secundam heredem dicit, aut

bonam parentem, aut malam hominem, sed masculine tametsi de femina sermo habeatur. Nam Marcus ait: heredes ipse secundus. Et Pacuvius in Medo, cum ostenderet a Medo matrem quaeri, ait: Te Sol invoco, ut mihi potestatem dvis inquirendi mei parentis. Sed Gracchus: Suos parentes amat, cum dicit in significatione matris. Et in alia epistula: Tuus parens sum ait, cum de se loqueretur. Et apud Virgilium sic legimus: Ecqua tamen puero est amissae cura parentis.“ — v. d. justo brevius adscripsit: „Uterque locus aperte desumptus ex epistolis matris Corneliae.“ unde aegre cognoscere licet, quam sententiam de h. l. conceperit, quem non melius intellexit Meyer. frg. Or. p. 127, ed. pr. „suos parentes i. e. pro matre Gracchus dicit parentes, ut alius auctor tuus parens sum h. e. tua mater.“ Neque Garatonium ad Cic. Phil. II, 20 laudare opus erat, qui usus quidem Charisii loco, Gracchi tamen verba omisit. Quae ut nunc sunt, et sana esse et perspicua mihi quidem videntur. Charisius enim, ut demonstraret, parentis vocabulum, sive de mare, sive de femina usurpatum, semper masculini generis esse, scite duos locos ex epistolis C. Gracchi delegit, quorum altero matrem, altero se ipsum significans, eodem genere usus erat. Nam ad vocem *ait* necessario idem subjectum requiritur, quod cum *dicit* junctum praecesserat, i. e. Gracchus, neque ex vocabulo *matris* ad sequentia: *Et in alia epistula*, matrem subintelligere licet, quo facto saltem verba: *Tuus parens sum* Corneliae vindicarentur, quae insuper ex mente matris languidiora sunt, contra filio adscripta, singularis pietatis testimonium exhibent. — Quae quum ita sint, mihi Corneliae epistolae, nisi

forte Muciani industria servatae, jam pridem intercidisse videntur, quippe quarum post Plutarchum nulla fiat mentio. Neque id mirum. Nam ad eas servandas historicorum antiquorum consuetudo scribendi parum contulit. Qui quanquam inde a Catoe orationibus suis in Origines receptis, his annalibus inserendis rerum atque hominum locupletare coeperunt memoriam, sicuti Cic. Brut. 21, 81 testis est, Q. Metelli orationem contra Ti. Gracchum expositam fuisse in C. Fannii annalibus, tamen Meyer. fr. hist. Rom. p. 250. ed. sec. temere conjecisse videtur, epistolas C. Gracchi non ab ipso editas, sed a C. Fannio, qui totam Gracchorum historiam perscripsit, huic insertas fuisse. Nam epistolarum, in libros historicos receptorum perquam exigua memoria superat. Trium enim historicorum, quorum exemplo utitur Krause. hist. Rom. fr. p. 173, 249, 302, Val. Antiatis, Cl. Quadrigarii, Sisennae, re accuratius inspecta fere ad nihilum auctoritas redit. Et Val. Antiatis annalibus inclusas fuisse epistolas ex Gell. VI, 8 non posse colligi, jam recte monuit Liebaldt. (De Val. Ant. Numbg. 1840. p. 20.) Quod ad Sisennam attinet, omnes eos locos, qui leguntur apud Non. rv. Nolite, Deducere, Necessitudo, Illex, Nex ex orationibus desumptos esse, neque vero ex epistolis probavit Wernicke (Sisenniana. Thoruni. 1829. p. 26.) Cl. Quadrigarii ex libro duodevicesimo principium apud Gell. 1, 7. ipsius auctoris epistolam inchoare, ad eum, cui librum miserat, verissime censet Giesebrecht. (Üb. Q. Claudius Quadrig. Prenzlau. 1831. p. 13.) Itaque ex eodem unae literae supersunt, quas ad Pyrrhum C. Fabricius et Q. Aemilius consules miserunt. (Gell.

3, 8.) Si ad inferioris aevi historicos transgredimur, non frequentiorem epistolarum usumprehendimus, nam praeter Lentuli inclytas literas ad Catilinam datas apud Sall. Cat. 44, 4 superstites, quibus accedunt ex ejusdem historiarum libris excerptae epistola Cn. Pompeji ad senatum et Mithridatis ad Arsacem regem ab Orellio cum Vellejo Paterculo editae, mihi nullas indagare contigit. Livius quoque rarissime literarum mentionem facit, neque nisi publice missarum: 5, 28, 13, 27, 39, 1, 45, 1, 6. Unde conjicere licet, neque eos historicos, quorum opera interciderunt, plura epistolarum exempla continuisse, quod in universum jam propter Graecorum scriptorum similem de his abstinentiam expectare licebat, ad quorum imitationem Romani se componere solebant. Videntur autem in epistolis adhibendis, si ex paucis exemplis conjecturam facere licet, historici Romani, aliam atque in orationibus utendis rationem secuti esse. Has enim, de verbis genuinis minus solliciti, suo plerumque stilo refingebant, illas, fortasse propter brevitatem, intactas reliquerunt, addentes insuper, earum exemplum sese reddidisse. Quo magis dolendum est, epistolas raro ad fidem historiarum augendam propositas inveniri. Eloquentiae autem studium adeo Romanorum animos occupaverat, ut et aliis literarum generibus et epistolari officeret, unde harum conservandarum negligentiam et in iis quae aetatem tulerunt libris penuriam merito derivaveris. Epistolae vero, quo magis dicendi libertas delitescibat, orationis locum obtinuisse videntur, ita ut apud posteriores demum artis rhetoricae magistros, earum scribendarum praecepta reperiantur. cf. Bhd. Gesch. d. R. L. p. 290. Westermann G. d.

R. B. p. 304. Quod si ad Corneliae epistolas applicuerimus, patebit, earum fidem minus suspectam fore, si apud antiquum historicum reperirentur, quam si ex novissimae antiquitatis opere prodirent.

His praelibatis ad eas epistolas progrediendum est, quae sub nomine Corneliae cum Aemilii Probi et Cornelii Nepotis reliquiis conjungi solent. Habes eas ad calcem scriptionis nostrae ex editione Rothii Basil. 1841 repetitas. De quibus vv. dd. secundum eam quisque sententiam, quam de moribus Corneliae rebusque gestis Gracchorum concepissent, sententiam proposuisse, nullis plerumque argumentis adhibitis, non est quidem mirum, neque tamen quidquam ad quaestionem nostram enodandam contulit. Qui primi has reliquias ex mss. protractas in lucem ediderunt, de fide atque auctoritate earum nulli dubitasse videntur, quales Savaro, Schottus in Pighi. Annal. T. 5. p. 44, Rutgersius Var. Lectt. V, 12. p. 490, Salmasius Exerc. Plin. T. I. p. 293, quorum iudicium qui sequerentur, neque postea defuerunt, Fabricius ad Dion. Cass. T. I. p. 38. et in bibl. Lat. T. I. p. 110, Ellendtius Prol. Brut. p. 38, Schlosser. Univ. Uebers. T. 2. p. 2. p. 267. Quibus nuper accessit Gerlachius (Tod d. Scipio p. 43), eamque sententiam paulo amplificatam repetit in Stud. hist. p. 242 et in scriptione de Ti. et C. Gracchis p. 37 nullis aliorum dubitationibus de genuina epistolarum indole suam fidem concussam esse profitetur, neque aliter sentientem Klotzium deprehendimus in Annal. philol. Lips. XIV, 40. 4. p. 381. (a. 1844.) Ad horum virorum partes pertinent quoque Lindemannus ad Charis. l. 1. et

Hartungus Rel. d. R. T. I. p. 44. Verum jam Schotto Not. in frgm. Nepotis p. 117. (cf. Bardili. T. 2. p. 372) oborta est fraudis suspicio, quam deinde repeterunt Scheuius l. l. p. 196. Zumptius ad Quint. 1, 1, 6. (T. V. p. 10.) Meyer l. l. p. 111. ed. pr. p. 216 ed. sec. Bernhardy l. l. p. 88, qui laudato Cic. de or. 3, 12 rem confecisse sibi visus est, eumque secutus Hildebrandus l. l. p. 387., acriter is a Gerlachio in Stud. hist. p. 242 impugnatus. Gravissimi autem harum epistolarum adversarii extiterunt Heerenius Verm. hist. Schr. T. 3. p. 91 et Langius. Silv. Portens. in Act. soc. philol. Lips. T. 2. f. 1. p. 177 — 181. repet. in Verm. Schr. p. 108—112. Rem in medio relinquendam censuerunt Schottus, Baehrius R. Lg. p. 275. Reiffius l. l. T. I. p. 80. Westermannus T. 2. p. 71. Bardili T. I. p. 106. T. 2. p. 373.

In historia litteraria harum epistolarum persequenda ordiendum est a Jo. Savarone, qui primus eas edidit cum Aemilio Probo et Cornelii Nepotis fragmentis. Paris. 1602. ex codice ab Guiberto Mauguin, ecclesiae Claromontensis (Clermont-Ferrand) canonico et syndico accepto, inscriptas *Verba Corneliae Gracchorum matris ex Cornelii Nepotis libro excerpta*. cf. Roth, ed. Aem. Prob. p. 225. 236. 250. Bardili praef. p. 49. Non videtur is codex, quem etiamnum Montisferrandi asservari in bibliotheca civium Rothius p. 225 suspicatur, post Savaronem collatus esse, qui eum ceteris emendatiorem et integriorem habuit. Roth. p. 251. Sequitur Schotti. ed. fr. Coru. Nep. Francof. 1609. in quibus exemplum Verborum ex Epistola Corneliae ab Antonio Augustino Archiepiscopo Tarraco-

nensi anno circiter. 1585 acceptum typis exprimendum curavit, descriptum illud ex cod. Faesulano, de quo v. Roth. p. 213. Idem easdem reliquias insertas T. 3. Annalium Rom. a Pighio edicoeptarum, hoc defuncto edidit Antwerp. 1615. praefixo titulo: *Epistolarum fragmenta duo, Corneliae P. F. Gracchorum matris ad C. Sempronium filium tribunatus plebis Candidatum ex Corn. Nepotis libro de Latinis historicis.* Roth. p. 236, qui tamen non recte scribit, tum edita non fuisse, quum Pighius a. 1604 diem obiisset. Rinck. Prolog. ad Aem. Prob. p. 16. Roth. p. 236 censet eum ab Epistolarum fragmentis suis inventis corrupendis non abstinuisse e codice si non Gifanianus fuit (de quo Roth. p. 232), certe optimo decriptis. In Gifanii codice, quem saec. IX. non antiquiorem iudicat Rothius, Catonis vitam sequebantur *Verba ex epl'a Corneliae Gracchorum matris ex libro Cornelii Nepotis de Latinis historicis excerpta.* Hujus l. ms. varias lectiones Gifanius cum Puteanis, hi vero cum Schotto et Savarone communicarunt. Roth. p. 234. Cum Gifaniano codice ex Corn. Nep. de Latinis historicis libro has epistolas repetunt cod. ms. Florentinus saec. XIII. (R. p. 212) ubi praescriptum est *Verba ex Epistola quadam Corneliae Gracchorum matris ex Libro Cornelii Nepotis de Latinis Historicis ad C. Gracchum filium,* quae ex editione Savaronis recens librarius descripsisse videtur Rothio. p. 175. Sed eundem fontem haud dubie, quanquam brevius, indicant alii libri, collocantes Corneliae fragmenta post vitas Attici et Catonis, quibus adscriptum est *ex libro C. N. de hist. Lat.* qualis Florentinus sive Faesulanus saec. XV., qui habet:

*Verba ex Epistola Corneliae Gracchorum ex eodem* (R. p. 213), Gwelferbytanus saec. XII. (R. p. 219.) ubi legitur: *Verba ex ep̄la Corneliae Gracorum matris ex eodem libro Cornelii Nepotis excerpta*, Ottobonianus 1435 saec. XV. exhibet *Verba ex epistola Corneliae Gracchorum matris ex eodem Cornelio*. (R. p. 215.) Ab his recedunt eatenus, ut titulum libri Cornelianum omittant, Vossiani duo (R. p. 227. 228.), quorum A. *Verba Corneliae Gracorum matris ex Cornelii Nepotis libro excerpta*, C. *Corneliae Gracorum matris ex Cornelii Nepotis libro excerpta*, et Urbinas 436 (R. p. 216.) in quo est: *ex epistola Corneliae matris Gracorum ex eodem*. Contra *ex libro historiarum latinarum Cornelii nepotis* reliquias derivare videntur Cod. collegii Romani saec. XIII. (R. p. 217), qui, inde repetita Catonis vita, exhibet: *Pomponii Attici vita et mores. Verba Corneliae Gracchorum matris ex Cornelii Nepotis libro excerpta*, Gaddianus saec. XV. (R. p. 212) in quo praecedit: *Historiarum Latinarum Cornelii Nepotis Vita Attici*, sequitur: *Vita Catonis. Verba Corneliae Gracorum Matris ex Cornelii Nepotis Libro*. Eandem praescriptionem habent Monacensis saec. XV. (R. p. 222), Parisiensis 5826 (R. p. 224) et Mediolanensis XIV. (R. p. 210), in quibus tamen Corneliae fragmenta desunt. De Mediceo 30. v. infra. Discrepat rursus Harleianus saec. XV. (R. p. 229.) *V. C. M. G. ex Cornelio Nepote et aliunde*. Auctoris nomen desideratur in Alexandrino 768 saec. XV. (R. p. 216.) *Verba Corneliae matris Gracorum*, Patavino saec. XV. (R. p. 209.) *Epistola C. Gr. M. ad Filium*, Mediceo 30. saec. XV. (R. p. 211) *Epistola de morte Tiberii Grac-*

*chi auctore anonymo, Mediolanensi 2. qui verbose praescribit: Ex fragmentis epistolarum Corneliae Scipionis Africani superioris filiae Ti. et C. Graccorum matris ad Caium filium.* Titulo non distinguuntur a Catone in Mediceo 25. saec. XV, cujus vitae pariter adhaerere videntur non discreta Rothio p. 213 in Mediceo 57. saec. XV. — Quae titulorum varietas et inconstantia etsi harum epistolarum fidei non admodum favet, plurimi tamen et optimi codd. nexum quendam inter eas atque Corneli Nepotis librum aliquem fuisse docent. Jure autem docti homines concoquere non potuerunt, quomodo Cornelia locum habuerit inter historicos Latinos, Bardill T. I. p. 106. neque satisfaciunt, quibus eam quaestionem expedire conatur Rinckius p. 16: „Corneliam quidem, Gracchorum matrem, nusquam historicis adnumerari dicit Bardilius p. CVI. Ejus tamen eloquentiam in scriptis haud dubie declaratam laudavit Cicero.“ Rectius idem alteram inscriptionem historiarum Latinarum respuit p. 17, quippe codicum, qui minus ponderis habeant Guelpherbytano, insuper dubitans, possitne historia latina pro historia romana latine dici. Videtur enim potius iis libris credere, qui nullius auctoris nomen prae se ferunt p. 16., quanquam p. 22 Corneliae epistolas inter fragmenta librorum de vv. illustribus collocari jubet, quorum pars fuerit liber de historicis Latinis. Sed tamen recte jam Heerenius l. l. p. 92 censuit, inter duces Romanos apud Cornelium Nepotem Gracchis quoque locum fuisse, quum Plut. v. Ti. Gr. 21 ad ejus auctoritatem provocet. Et poterant iidem vel ob eloquentiam, aut Gaius saltem ob librum historici argumenti, cujus memi-

nit Plnt. v. C. Gr. 8. inter historicos recenseri. Modo certius de hoc opere Corneliano constaret, quod nulli veterum scriptorum memoratum, tantum codicum auctoritate niti observandum est. — Alterum, quod attendere opus, locus est, quem inter vitas superstites epistolae obtineht. Plerumque enim subjunctae leguntur Catoni, excepto codice coll. Rom., qui eas post vitam Attici habet, quem Cato praecesserat, additque post verba Corneliae: *Hi sunt quorum vita ab emylio probo descripta hoc codice continentur*, cod. Alexandrino saec. XV, (R. p. 216) et Ottoboniano 1455. saec. XV. (R. p. 215.), in quibus Catonis vita omnino deest. Adhaerent Catoni in iis adeo codd., qui perversum vitarum ordinem habent, ut in Mediceo 25. (R. p. 212.) in Vindobonensi Pal. 3155 (R. p. 222.) Chisiano 13 (R. p. 217), fortasse in Strözziano (R. p. 213) praeterea in Patavino (R. p. 209), qui Attici et Catonis vitas ceteris praeponit. Idem fit in Vossiano C. (R. p. 228.) In nonnullis mss. omnino desunt, ut in Florentino. (Rinck. p. 21) in Parisiensi (Roth. p. 224) aliis. Attici autem et Catonis vitas quum ad Cornelium Nepotem quam ad Aemilium Probum vv. dd. referre propensiores sint, his vero junctas videamus Corneliae epistolas, verisimilius erit, eas, si non ex opere quodam Corneliano, sed aliunde accesserint, jam pridem cum locum obtinuisse, quam ab recenti demum librario adjectas videri.

Quodsi externa harum reliquiarum historia non sat idonea argumenta genuinae fictaevae earum indolis suppeditat, tanto majori studio res et verba perseguenda erunt. Quo munere ita defungemur, ut eorum, qui fidei aut defensores aut adver-

sarif extiterint, rationibus pensitatis, nostram sententiam subjungamus. Missis autem iis, qui sensu potius obscuro, quam argumentis rem dijudicare maluerunt, inter fidei epistolarum adversarios primus commemorandus Heerenius Verm. Schr. T. 3. p. 91. cujus verba Latine expressit Lange l. l. p. 108: „Haec fragmenta reperiuntur inter fragmenta Cornel. Nepotis p. 810 ed. Staveren., ubi Criticorum sententiae de *ἀδελφείᾳ* eorum, quauquam nullis rationibus allatis, collectae leguntur. Miki quidem dubia illa est. Nam primum non probabile est, Corneliam his de rebus ad filium scripsisse, cum ambo tum Romae essent, deinde ex Plutarcho II, 836 (= v. C. Gr. 4.) apparet, Corneliam Caii conatus, eo quo hic facit modo, non improbasse. Nihil agebat, nisi ut ferociam ejus leniret, ceterum curabat, ut ipsa gratia apud populum ne excideret, denique clausula secundi fragmenti satis clare declamatoris ingenium prodere videtur.“ Quae non admodum vera sunt. De commoratione enim Corneliae, quid sentiendum sit, diximus supra. Eam vero, quo tempore Gaius filius tribunatum petiturus erat, Romae fuisse, Heerenius non iuit demonstratum, neque id ullo modo probari posse crediderim. Altera, quam affert, ratio non magis valet. Filiorum conatus, praesertim Gaii matrem improbasse facilius evincitur, quam quod nullo exemplo munitum Heerenius censuit, ferociae tantum ejus leniendae causa ipsi adversatam esse. Deinde nihil est, quod Corneliam auram popularem captasse arguat, imo Plutarchus v. C. Gr. 4. ὁ δῆμος ἠγάσθη καὶ συνεχώρησε τιμῶν τὴν Κορνηλίαν οὐδὲν ἤτιον ἀπὸ τῶν παίδων ἢ τοῦ πατρὸς. Tertium denique argumentum, a rhetorico fragmentorum

colore petitem, non est quidem per se absonum et magnopere iis probabitur, qui propter Ciceronis de or. III, 12, 45 verba: „Equidem cum audio socrum meam Laeliam (facilius enim mulieres incorruptam antiquitatem conservant, quod multorum sermonis expertes ea tenent semper, quae prima didicerunt), sed eam sic audio, ut Plautum mihi aut Naevium videar audire.“ — (Bhdy. p. 88.) in Corneliae epistolis simplicem et non fucatum sermonem requirant; Ciceronis tamen sententia ad Corneliā minus pertineat, quae et multorum hominum consuetudine et Graecarum haud dubie literarum notitia a vulgari mulierum eruditione desciverat. (v. Gerl. hist. Stud. p. 242, ann. 2.) Sed multo acrius has reliquias exagitavit A. G. Langius l. l., qui non solum spurias esse aperte proclamavit, verum argumentis quoque probare studuit. Quae jam dispicienda sunt. Primum vero quod de externa fragmentorum auctoritate parum certa conqueritur, ea quomodo se habeat, supra quantum licuit exposuimus, quanquam ita res ad finem non perducitur. Injuria tamen mihi conjecisse videtur „si alicubi in antiquis libris legantur, tantum ob nominum Cornelii et Corneliae similitudinem ista et Cornelio et Cornelia aeque indigna in aliquot Nepotis codices irrepsisse,“ cui sententiae et plenior harum epistolarum praescriptio et is nexus adversatur, qui ex testimonio Plutarchi de rebus Gracchorum a Cornelio Nepote narratis accedit. Deinde neque moribus neque ingenio generosissimae feminae convenire censet p. 120. laudatis Plut. ex v. C. Gr. 13. 19. verbis, quae supra attulimus, unde tamen nequaquam efficitur, Corneliā a consiliis C. Graechi non fuisse alie-

nam, quod vel Hildebrandus. p. 588. non minus Corneliae et ejus reliquiis infensus, concessit. Indignam Corneliae animo censet sententiam „nihil esse neque majus, neque pulchrius cuiquam, quam inimicos ulcisci,“ indignum quod filium increpat, ne conatibus suis perturbet sibi reliquam vitae partem in tranquillitate degendam, indignum, si eidem permittit, quodcumque libuerit, vel adversus rempublicam facere, modo se mortua et nihil sentiente. In quibus illud de ultione dictum non est fidei Christianae modulo metiendum, multoque verius et fortasse aequius judicaremus, si ethicae Romanae, non ex philosophorum scriptis derivata, verum vitae quotidianae exemplis illustrata lineamenta teneremus. Antiquos autem homines de ulciscendi jure aliter atque nos sensitisse, quis est qui dubitaverit? Quod vel Martis Ultoris templum ab Augusto aedificatum et Ultionis ara (Tac. An. 3, 18) testabuntur. Neque ab ea animi perturbatione omnes politioris vitae homines alienos fuisse Cornelius Nepos significat, qui de Attico scribit c. 11. „neque, si quam injuriam acceperat, malebat ulcisci, quam oblivisci.“ Quid, quod Val. Max. 9, 10. hoc ausus est: „Ultionis autem, quemadmodum acres ita justii aculei sunt: qui lacessiti concitantur, acceptum dolorem pensare cupientes.“ Quod si nostro loco inimici iidem sunt, qui ineunte altero fragmento Tiberium Gracchum necasse dicuntur, nonne Gaius frater, quem ex orationum reliquiis eosdem acerrime increpuisse constat (Meyer. p. 228.), quodam talionis jure ad ultionem duci videbatur, a qua tamen mater, ejusdem sensus plena, eum revocavit? Quae dum reipublicae causa suam ipsa ultionem cohibet, nonne maxi-

mis civibus accensenda est, quos Romana antiquitas tulit? Ita fere locutus esset, qui quovis pretio has reliquias Corneliae vindicare studeret, idque non male, nisi obstarent alia. Verum idem, epistolis quidem servatis, multo gravius damnum contraxerit. Mores enim Corneliae, si caedis suspicionem vacant, neque ulciscendi cupidinem ferunt. Quae praeterea Langium offendunt, sunt quidem minoris momenti, sed cum dignitate parum conjungenda et inter tria illa dicta extremum ita comparatum est, ut primo adversetur. Sed in singulis quoque Langius suspicionem motam diligenter persequitur, quem doleo pntidum habuisse omnia quae non modo in orationis elegantiam, sed etiam in communem sensum peccata sint, enumerare. Subsistens in alterius fragmenti initio, haec criminatur: „Quis quaeso in tali re exspectet conceptorum verborum solennitatem, quis juris jurandi religionem? Ridicula profecto mater, cui erga filium ad indignationem comprobendam jure jurando opus est.“ Ignoramus quidem, quem in epistolis scribendis morem ejus saeculi homines secuti sint, in quotidiano autem sermone asseverandi et obsecrandi formulis non pepercisse Plautinae maxime fabulae docent. Cujus consuetudinis ipsam Corneliā in altera epistola extrema non habemus expertem (Ne ille sirit Juppiter), quae, si cum filio praesenti egisset, satagisset fortasse una vocula, ad absentem conversam paulo graviora verba decebant. In sequentibus rursus Langius haeret: „Quaenam sunt istae res, quas vage commemorat?“ Eae illustrantur infra locutione: *rerum majorum quicquam*. Et poterat mater, ceterum non admodum breviloquentiae studiosa,

ita dicere, si memineris, In deperdita epistolae parte fortasse praecessisse, quae nunc obscurius significantur. Nisi idem fieret saepius. 1. *ea persequi*. 2. *modus ei rei. ea perseverare*. Missis quae postea in censum venient, Langius subjicit: „Haecenus misellum declamatorem tenemus tanquam reum convictum, habebimus confessum, si quae fraudis adhuc parum cautus manifesta indicia effudit, verbo tetigerimus. Vehementer enim personatae suae Corneliae oblitus est, dum eam scribentem facit: *qui Ti. Gracchum necarunt*.“ Idque tanto verius v. d. scribit, quod C. Gracchus ap. Char. p. 214. P. ita dixit: „Pessimi fratrem meum optimum interfecerunt,“ et apud Schol. Bob. p. 365. Or.: „cum genere summo ortus essem et cum fratrem propter vos amissem, nec quisquam de P. Africani et Ti. Gracchi familia nisi ego et puer restaremus.“ Quodsi is publice locutus, fratris appellatione supersedere potuit, nam Ti. Gracchi nomen patrem significat, videtur Cornelia modum excessisse, filium plenius Ti. Gracchum nuncupans, quae appellatio inter familiares ad patrem designandum reservata fuerit. Sic Cicero in epistolis, quae sunt ad Terentiam et Atticum filium semper Ciceronem aut Marcum, nunquam M. Ciceronem dixit. Schottus quidem ap. Pighi. l. l. non Ti. Gracchum, sed Ti. filium exhibet, quam lectionem non codicibus debere videtur, quorum nunc nullus eam confirmat. Pergit Langius: „Et cujus notae ista sunt: quando desinet familia nostra insanire? quaenam familia? Num Tiberius familia est? Legerat nimirum, Gracchos insanisse, sed inmemor nunc erat temerarius scriptor, alterum fratrum nunc primum petere tribunatum.“

Quae majorem speciem quam veritatem habent. Nam ita loqui matrem quid vetat, quae praevidebat Gaium quanquam nullas dum leges proposuerat, Tiberij fratris consilia continuaturam esse, praesertim quum praeter eum et puerum nemo de Ti. Gracchi familia superaret. Necessario autem haec epistola ad Gaium prioris tribunatus candidatum pertinet, nam a petendo altero tribunatu matrem eum epistolis missis dehortatam esse parum verisimile est propter verba Plut. v. C. Gr. 8. Γάιος δὲ δήμαρχος ἀπεδείχθη τὸ δεύτερον, οὐ παραγγέλλων, οὐδὲ μετιῶν ἀλλὰ τοῦ δήμου σπουδάσαντος. Quamobrem non multum tribuerim conjecturae a Langio propositae p. 112, cui verba Plut. v. C. Gr. 13 Ἕτεροι δὲ καὶ παντὸς τῆς Κορηλίας δυσχεραίνουσης ταῦτα πράττεσθαι λέγουσιν videntur fingendae hujus epistolae opportunitatem scholastico cuidam homini otio male abutenti dedisse. Plutarcheus quippe locus ad alterum Gaii tribunatum pertineat, quo commota si ad epistolam fingendam Cornelia personata se composuisset, magis atque nunc fit, temporum conditionem respexisset. Nunc vero epistolam ita comparatam habemus, ut ad alterum quoque tribunatum et fortasse melius referretur, unde tamen Plutarchi testimonium eam arcet. Quam quidem ambiguitatem fidem ejus labefacere, nemo non videt. Restant quaedam a Langio reprehensa. Haeret in dictione: *molestiam alicui aut laborem tradere*. Inaudita profecto et male Latina, neque Silliano 4, 52. *metus tradunt defendenda*. Graecissimum olet *μεταδιδόναι πόρων*. Eurip. Or. 275, condonandum fortasse Corneliae graecissanti. Sed alia iusunt, non minus insolita. Sic *perpudescet* est singularē, *partes tolerare* pro in locum alicujam

succedere aegre repereris. Nonne haec antiquitatis potius certissima documenta, quam praeterea redolet usus particulae *quatinus*. cf. Fest. p. 258. M. verbum *profligandi* Gell. 15, 5. *dejerandi*. Non. p. 105. vocabulum *pausae*. Non. p. 158. proba omnia et antiqua. Antiquae religionis sunt: *parentabis mihi et invocabis deum parentem*, quo loco Hartungum sine ulla suspitione usum vidimus, quem tamen audacius Lindemannus propter Charisianum commentum correctum voluit: *et invocabis tuam parentem*. De divinis manuum honoribus cf. Hertzberg. de diis Rom. patriis. p. 5. sq. Schoemann. de diis manib. larib. et gen. p. 11., quorum tamen uterque nostro loco caute abstinuit.

Summo denique jure Langius notavit intolerabilem battologiam verborum „Denique quae *pausa* erit? ecquando *desinet* familia nostra insanire? ecquando *modus* ei rei haberi poterit? ecquando *desinemus* et habentes et praebentes molestiis *desistere*?” Nonne talia Corneliae jam senescenti propria? dixerit fortasse quispiam defensorum. Nonne quod intra paucos versus eadem se locutiones excipiunt (1. res. p. profligetur atque perest. 2. rem. p. profliges. perperdescet — non pudet te. maxime mihi placere — tute tibi placere. ea perseverare. Et si perseveras. in senecta haberem — cui parva pars vitae superest — Ne id quidem tam breve spatium. ubi ego mortua ero — Ubi mortua ero.) simplicitatis totidem et antiquitatis documenta sunt, necessariam fortasse scribentis festinationem et modo scripta parum recordantis contestantia? Talia profecto in utramque partem trahi possunt, sed tamen studio magis et consilio, quam forti deberi videntur.

Contra ad epistolarum fidem tutandam ab uno Gerlachio hist. Stud. p. 242 pauca eaque levidentia argumenta allata video. Si modo argumenta dicenda sunt, quibus ille, Hildebrandum frustra pungens, quod is dixisset, temere a se epistolas genuinas habitas, superciliose rem absolvisse sibi videtur. Utinam v. d., lecta Langil diatribe, quam ignorare videtur, mortiferos ejus ictus fortiore brachio propulsasset. Cui enim haec tria ejus monita sufficient? Primum epistolarum dictionem antiquam esse et singulis adeo in C. Gracchi fragmentis obviis non dissimilem. Exempla nulla. Contra non levem aliquam discrepantiam supra demonstravimus. Deinde poscit, ut perspicue discrimen inter Terentianum sermonem et Corneliae stilum epistolarem exponatur. Quorsum hoc? et quasi utriusque similitudo ita confessa esset, ut rursus nullis exemplis res indigeret. Quae si vel ex parte constaret, ne faveret quidem epistolarum auctoritati, sed ad Aemilium Probum potius quam ad Corneliam nos transduceret, quam Terentianas formas usurpasse Rinckius l. l. p. 36. docuit. Denique Rothium amicum in critica Corn. Nepotis editione de genuina harum epistolarum auctoritate non dubitasse. Quid plura?

Omnia autem ubi mente comprehendimus, non possumus, quin Langio plurima favere confiteamur. Ut enim ab externa reliquiarum conditione ordiamur, ea cum difficillima de Cornelii Nepotis et Aemilii Probi libris quaestione ita conjuncta est, ut nisi haec firmiore tibi sine steterit, iudicium suspendendum sit. Deinde si cogitationes atque res contemplamur, non conspirant cum ea, quam nobis de moribus Corneliae informavimus

opinionē. Quae licet falsa vit, tamen propterea illae non statim veriores erunt. Epistolae si genuinae essent, non dubito, quin insigne notitiae nostrae de rebus Gracchanis incrementum accepissemus, quod, quales nunc sunt, habemus nullum. Ad eas concinnandas Plutarchi vitae Gracchorum sufficiebant. Et tamen vel his solum consultis, poterant fallaciores conscribi. Nunc quaedam consulto ambigua atque incerta sunt, male adhibitae cautionis testimonia. Verba denique antiquitatis quidem speciem prae se ferunt, sed quis nescit, quo obsoletiora fuerint, eo saepius apud infimae antiquitatis testes data opera reviviscere? Itaque verisimile est, epistolas illas a Corneliae stilo non esse profectas, idque tanto majorem speciem veritatis habebit, quo magis irrita eorum opera videri possit, qui contrariae opinioni favent. Quod si nostra disputatione auxisse potius inconstantiam et ambiguitatem nutantis quaestionis arguimur, tamen vel hoc in lucro deputandum erit, modo docti homines, nisi quis ab alterutra parte certiora protulerit, sine ira saltem atque studio in his reliquiis utendis versari velint.

---

## CORNELIAE

### epistolarum reliquae.

1. Dices pulchrum esse, inimicos ulcisci. Id neque maius neque pulchrius cuiquam atque mihi esse videtur, sed si liceat re. p. salva ea persequi. Sed quatinus id fieri non potest, multo tempore multisque partibus inimici nostri non peribunt

atque, uti nunc sunt, erunt, potius quam res. p. profligetur atque pereat.

### **Eadem alio loco.**

2. Verbis conceptis dejerare ausim, praeterquam qui Tiberium Graccum necarunt, neminem inimicum tantum molestiae tantumque laboris, quantum te ob has res, mihi tradidisse: quem oportebat omnium eorum, quos antehac habui liberos, partis eorum tolerare atque curare, ut quam minimum sollicitudinis in senecta haberem, utique, quaecunque ageres, ea velles maxime mihi placere, atque uti nefas haberes rerum majorum adversum meam sententiam quicquam facere, praesertim mihi, cui parva pars vitae superest. Ne id quidem tam breve spatium potest opitulari, quin et mihi adversere et rem. p. profliges? Denique quae pausa erit? ecquando desinet familia nostra insanire? ecquando modus rei haberi poterit? ecquando desinemus et habentes et praebentes molestiis desistere? ecquando perpudescet miscenda atque perturbanda re. p.? Sed si omnino id fieri non potest, ubi ego mortua ero, petito tribunatum; per me facito, quod lubebit, cum ego non sentiam. Ubi mortua ero, parentabis mihi et invocabis deum parentem. In eo tempore non pudet te, eorum deum preces expetere, quos vivos atque praesentes relictos atque desertos habueris. Ne ille sirit Juppiter te ea perseverare, nec tibi tantam dementiam venire in animum! Et si perseveras, vereor ne in omnem vitam tantum laboris culpa tua recipias, uti in nullo tempore tute tibi placere possis.

---

## CORRIGENDA.

- p. 4. l. 16. distingue post: vacent  
p. 5. l. 27. lege *ιστοροῦσαι*  
p. 7. l. 9. l. τοὺς  
p. 8. l. 27. post *ἡλικίαν* disting.  
p. 9. l. 24. l. Bürgerkr.  
p. 14. l. 8. l. pluri-  
p. 16. l. 6. post Plutarchus dele punctum  
p. 16. l. 7. l. τοὺς  
p. 16. l. 14. l. Ptolemaeum  
p. 20. l. 5. post fortasse dele comma  
p. 26. l. 1. l. tantopere  
p. 26. l. 5. l. missis  
p. 26. l. 20. post Gerlachius dele punctum.
-